

## Morning Regional Dogri News Bulletin, 25<sup>th</sup> July 2024

मार्निंग डोगरी न्यूज़ बुलेटिन, समें. 09-20 Hrs

<><><><><><>

एह आकाशवाणी जम्मू ऐ, बड्डलै खबरें च तुंदा सुआगत, पैहले खास-खास खबरें कन्नै में प्रोमिला जम्वाल।

### Headlines

1. उपराज्यपाल मनोज सिन्हा होरें आखेआ जे पाकिस्तान जम्मू दी अमन शांति भंग करने दी कोशश करा'रदा ऐ ते आतंकिएं आस्सेआ बगाए गेदे लहुएं दे हर तोपे दा बनकदा परता दित्ता जाग।
2. डिवीजनल कमीशनर जम्मू रमेश कुमार होरें जम्मू डिवीजन दी बिजली सप्लाई दी स्थिति दा जायजा लैता। 2024'25 ब'रे लेई बिजली दे किराएं च कोई बाद्धा नेई कीता गेआ ऐ।
3. गृहराज्य मंत्री नित्यानंद राय होरें आखेआ ऐ जे 2023 ब'रे थमां जम्मू कश्मीर च विदेशी सैलानिएं दी आमद च बाद्धा दर्ज कीता गेआ ऐ ते कन्नै गै कनून बवस्था दी स्थिति च सुधार दिखने गी लब्धा ऐ—सोची समझियै ना पत्थरबाजी कीती गई ते नां गै कोई हड़ताल।
4. सलाहकार भटनागर होरें जम्मू कश्मीर दिएं महिलाएं गी लाह पजाने आस्तै महिला विकास निगम दिएं सेवाएं गी महिलाएं तगर अपनी पुज्ज बनाने दा आह्वान कीता ऐ।

हून खबरें दी तफसील कन्नै श्रुति खजूरिया।

<><><><><><>

### LG-Sinha

उपराज्यपाल मनोज सिन्हा होरें आखेआ जे पाकिस्तान जम्मू दी अमनशांति गी भंग करियै विकास बाद्धे गी रोकने दी कोशश करा'रदा ऐ, पर आतंकवादिएं कन्ने लोकें दे लहुएं दे इक-इक तोपे दा बदला लैता जाग। उपराज्यपाल हुंदा एह ब्यान पिछले 45एं दिनें च जम्मू प्रांतै च होए दे आतंकी हमलें दी पछझेकडै च आया ऐ। राजभवन च इक समारोह दरान उपराज्यपाल होरें आखेआ जे इसलै समें दी मंग ऐ जे आतंकवाद खलाफ इक7जुट होइयै लड़ेआ जा। एह आखदे होई जे गुज्जर-बक्करवाल बन्ने पर सुरक्षा दी पैहली पंक्ति न। उनें दौनें समुदायें दे लोकें गी अपील कीती जे ओ जानकारी गी सुरक्षा बलें कन्ने सांझा करन। पिछले 45एं दिनें च जम्मू प्रांतै च 15 आतंकी हमले कीते जाई चुके दे न। इनें हमले च 10एं सुरक्षा कर्मिएं समेत दो अफसर शहीद होए ते 9 श्रद्धालु मारे गे न ते 58 जख्मी बी होए दे न।

<><><><><><>

## Div.Com.Jammu

जम्मू दे डिवीजनल कमीशनर रमेश कुमार होरें जम्मू खित्ते दे जिलें दी बिजली सप्लाई दी स्थिति दा जायजा लैता। डिवीजनल कमीशनर होरें गी जम्मू च बिजली दी बंड सरबंधी जेपीडीसीएल बारे व्यापक ब्यौरा दित्ता गेआ। उनेंगी ग्रिड स्टेशन दे कम्मकाज ते बिजली सप्लाई सरबंधी कम्में कारवाइएं बारे बी दस्सेआ दसाया गेआ। डिवीजनल कमीशनर होरें पीडीडी दे अफसरें दी हिदायत कीती जे ओह सारी थाहर बेहतर बिजली दी सप्लाई गी जकीनी बनान खास करी उनें इलाकें च जित्थे स्मार्ट मीटर लग्गे दे न। बिजली दी कटौती गी घट्टोघट्ट करने लेई उनें बिजली दी बंड ते ट्रांसमीशन च आवा'रदी रुकावटें गी दूर करने लेई गलाया तां जे लोकें गी राहत हासल होई सकै।

<><><><><><>

## JKPDD Bills

बिजली दे उपभोक्ताएं गी बड़ी राहत दिंदे होई जम्मू कश्मीर बिजली विकास विभाग नै कल घोषणा कीती जे जम्मू कश्मीर सरकार नै बिजली दे बिलें पर सब्सिडी दे रूपे च 2024-25 आले माली ब'रे च बी बिजली दे किराएं च बाद्धे गी अपने सिर लेने दा महत्वै आला फैसला कीता ऐ। इसलै जम्मू कश्मीर दे बिजली दे किराएं बारे गल्ल करदे होई एह दस्सेआ गेआ ऐ जे 6एं ब'रें दे वक्फे मगरा बिजन किराया बघाए दे अक्टूबर 2022 च लागू कीते दे बिजली किराए च 17 फीसद तकरीबन 17 फीसद दा बाद्धा दर्ज कीता गेआ ऐ। 2023-24 आले माली ब'रे लेई बिजली दे किराएं च उपभोक्ताएं गी 15 फीसद बाद्धा देना पौना हा पर सरकार नै 15 फीसद बिजली दे किराए पर बिजली ड्यूटी हटाइयै संतुलन बनाई रखेआ ते उपभोक्ताएं पर कोई बाद्धे गीार नेई पेआ। इससै चाल्ली चालू माली ब'रे 2024-25 लेई बी सरकार नै बिजली दे किराएं भाड़े च कोई बाद्धा नेई कीता ऐ।

<><><><><><>

## J&K Tourists

जम्मू कश्मीर च 2023 मगरा सोची समझियै ते किट्टै रलियै पत्थरबाजी ते हड़ताल करने दी इक बी घटना नेई दिक्खी गई ऐ। केन्द्र शासत प्रदेश च सैलानिएं दी आमद 2.5 गुणा बधी ऐ। दफा 370 दे हटने मगरा जम्मू कश्मीर च पूरी पराती कनून बवस्थाा च व्यापक ते टकोहदा सुधार होआ ऐ। राज्यसभा च इक लिखित सुआले दा परता दिंदे होई गृह राज्यमंत्री नित्यानंद राय होरें आखेआ जे 370 गी हटाने मगरा केन्द्र शासत प्रदेश जम्मू कश्मीर शांति, प्रगति ते खुशहाली दा युग दिक्खारदा ऐ। स्कूल, कालेज, विश्वविद्यालय, अस्पताल ते होर

दुए संस्थानें पिछले चऊं ब'रे दरान बिना कुसै हड़ताल जां पही कुसै बी चाल्ली दी गड़बड़ी दे कम्म करा'रदे न। बेहतरनी कनून बवस्था करी जम्मू ते कश्मीर च 2023 च 2 करोड़ 11 लक्ख रिकार्ड सैलानी आए।

<><><><><><>

## Parliament

लोकसभा च केन्द्रीय बजट पर बैहस दी शुरूआत करदे हाई कांग्रेस दी कुमारी शैलजा होरें बेरोजगारी दा मुद्दा पुट्टेआ ते आखेआ एह मुलख च दिन-ब-दिन बधदी जा'रदी ऐ। उनें सुआल कीता जे सरकार खाली पेदी असामिएं गी पुर करने लेई गैह नेइं पुट्टा'रदी ऐ। शैलजा होरें मंग कीती जे सरकार गी करसानें गी घट्टोघट्ट समर्थन मूल्ल दी गरंटी देनी लोड़चदी ते घट्टोघट्ट दिहाड़ी 400 रपे रोज स्हाबै तैह कीती जानी चाईदी। चर्चा च हिस्सा लेंदे होई बीजेपी दे बिप्लब कुमार देव होरें आखेआ जे 2014 च जिसलै बीजेपी सत्ता च आई ही तां भारत 5 कमजोर मुल्ले च हा। देव होरें आखेआ जे नरेन्द्र मोदी सरकार नै आर्थिक सरिस्ते गी पारदर्शी बनाया ऐ। उनें आखेआ जे आर्थिक सर्वेक्षण च भारत दे सकल घरेलू उत्पाद च असल बाद्धा साढ़े 6 थमां 7 फीसद रौहने दा अनुमान जाहर कीता गेआ ऐ। उनें 2024-25 आले केन्द्रीय बजट गी जरूरत पर अधारित बजट दस्सेआ। डीएमके नेता दया नीधि होरें आखेआ जे मुख्य दे लोकें गी मैहगाई दी मार झल्लनी पवा'रदी ऐ। एनसीपी दी सुप्रिया सूले होरें जम्मू कश्मीर च विधानसभा चुनां करोआने दी गल्ल कीती। राज्यसभा च बीजेपी दे राधा मोहन दास अग्रवाल होरें आखेआ जे सरकार दी जन धन योजना कन्नै मुख्य दे करोड़ं बद्धे लोकें गी बैकिंग सेवा दित्ती गई। उनें आखेआ जे ग्रामीण इलाके च 14 करोड़ थमां मते घरें गी नलके राएं पीने आला पानी उपलब्ध करोआया गेआ ऐ। अग्रवाल होरें आखेआ जे आयुष्मान भारत स्कीम गरीब लोकें गी सेहत सेवा उपलब्ध करोआने च महत्वपूर्ण साबत होई ऐ।

<><><><><><>

## Amarnath

श्री अमरनाथ जी दी यात्रा लेई श्रद्धालुएं दा इक होर जत्था जम्मू दे भगवती नगर आले आधार शिविर थमां कश्मीर घाडी लेई रवाना होआ। इस जत्थे च 3 जहार 89 श्रद्धालु 106 गड्डिएं दे काफले च सुआर होइयै बडलै मूह न्हरे इत्थुआ निकले। श्रद्धालु दे इस जत्थे च 2 जहार 247 मर्द, 745 महिला, 73 साधु, 22 साधवियां ते 2 ट्रांसजेंडर शामिल हे। इंदे च 1 जहार 246 श्रद्धालु बालटाल लेई ते 1 जहार 803 श्रद्धालु पहलगाम लेई रवाना होए, जित्थुआं ओह अपनी अगड़ी यात्रा दी शुरूआत करगंन।

<><><><><><>

ते हुन बाकि दिएं खबरें कन्नै प्रोमिला जम्वाल।



## Advisor Bhatnagar

उपराज्यल हुंदे सलाहकार राजीव राय भटनागर होरें कल जम्मू कश्मीर महिला विकास निगम जेकेडब्ल्यूडीसी दी इक बैठक दी अध्यक्षता करदे होई निगम गी अपनी पहुंच बधाने ते निगम गी अपने लक्ष्य पूरे करने लेई योजना बनाने लेई आखेआ तां जे निगम दे लक्ष्यें गी असरदार ढंगै सिर हासल कीता जाई सकै। सलाहकार भटनागर होरें निगम दा आह्वान कीता जे बक्ख-बक्ख पछोकड़ै थमां महिलाएं दे समाजिक-आर्थिक विकास बाद्धे लेई निगम दी इक महत्त्वै आली भूमका ऐ। निदेशकें दे बोर्ड नै आखेआ जे महिलाएं तगर अपनी पुज्ज बनाइयै उनेंगी सरकार आस्सेआ चलाई गेदिएं स्कीमें बारे जागरूक करना बड़ा लाजमी ऐ। बोर्ड नै कारपोरेशन दे प्रबंधन गी जम्मू कश्मीर च लोन मेले ते दुइयां गतिविधियां आयोजित करने दी ताकीद कीती।



## DC-Rajouri

राजौरी दे डिप्टी कमीशनर ओ.पी.भगत होरें साप्ताहिक ब्लाक दिवस प्रोग्राम तैहत बुद्धल न्यू ब्लाक दे द्रमन पंचैत च लोकें तगर पुज्ज बनाने लेइ लाए गेदे शिविर च शिरकत कीती। इस शिविर राएं लोकें अपने बक्ख-बक्ख मामलें गी उजागर कीता, जिंदे च बिजली ते पानी दी सप्लाई सेहत सुविधा, शिड़क, शिक्षा ते निकासी सरबन्धी सरिस्ता शामिल हा। डिप्टी कमीशनर होरें लोकें दिएं समस्याएं ते मंगें गी ध्यानै नै सुनेआ ते जायज मंगें ते मसलें दा समे बद्ध ढंगै सिर नबेड़ा करने लेई गलाया। डिप्टी कमीशनर होरें अफसरें पर जोर पाया जे ओह लोकें गी बुनियादी सहूलतां उंदे घरै कश उपलब्ध करोआने लेई पूरी उतसाह, निष्ठा ते तनदेही कन्नै कम्म करन।



## DC-Reasi

रियासी दे डिप्टी कमीशनर विशेष महाजन होरें बुड्डन पंचैत दे थूरु ब्लाक दे इक दूर-दरेड़े इलाके च ब्लाक दिवस मनाया। इस दरान डिप्टी कमीशनर होरें थूरु ब्लाक दे बसनीकें दिएं समस्याएं, परेशानिएं ते मंगें गी धरोइयै सुनेआ ते उंदा मौके पर निपटारा कीता। कृषि सेक्टर दी गल्ल करदे होइ उनें फसलें दी इक दे मगरा इक दी रड़ आले सरिस्ते दी महत्ता बारे दस्सेआ जे एहदे कन्ने जिमीं दी उर्वरक समर्थ बधदी ऐ।



## SKUAST Jammu

स्कास्ट जम्मू आस्सेआ उद्यमिं लेई इक दिनै दे सिखलाई प्रोग्राम दा आयोजन कीता गेआं जेहदा विषय हा-‘6मवेशिं दे चारे गी डिब्बाबंद करने लेई उद्यमिं कश हासल मौके’। इस मौके पर उद्योग-वाणिज्य मैहकमे दे निदेशक डॉ. अरुण मन्हास होरें नोजवानें उद्यमिं लेई जम्मू कश्मीर च सरकार आस्सेआ कृषि ते कन्ने लगदे सेक्टरें लेई शुरू कीती गेदिं स्कीमें बारे जानकारी दिती।

<><><><><><>

### **Ramban Dengue(byte)**

रामबन जिले च डेंगू दे मामले कन्ने निबड़ने लेई जिला प्रशासन ते सेहत मैहकमे नै डेंगू थमां बचाह लेई तौर तरीकें बारे लोकें गी जागरूक करने लेई जतन शुरू कीता ऐ। पिछले बरे डेंगू दे 65 मामले सामने आए हे ते जेहड़े कुसै होर जिले जियां जम्मू, कटुआ, उधमपुर ते सांबा दे मकाबले बड़े घट्ट हे। इस बारी मैहकमे आस्सेआ लोकें दे घर-घर जाइयै अभियान चलाया जा’रदा ऐ तां जे उनेंगी डेंगू थमां बचाह ते ओहदी रोकथाम बारे जानकार बनाया जा। पोस्टर ते लाउड स्पीकर रां लोकें च इस बारे जागरूकता फैलाई जा’रदी ऐ।

<><><><><><>

### **Doda Floriculture**

फुल्लें दी काशत ते बागें सरबंधी मैहकमे आस्सेआ डोडा जिले दी भद्रवाह थाहरे दे प्रगतिशील करसानें लेई इक दिने दे गल्लबात आले सत्र दा सरिस्ता कीता गेआ। एह सत्र फुल्लें दी काशत सरबंधी डरैक्टर जनरल जम्मू एस.जितेन्द्र सिंह हुंदी अध्यक्षता च होआ। फुल्लें दी काशत करने आले उत्पादकें गुट्टे ते लेवेंडर दी रड़ च आने आलिं मुश्कलें परेशानिं बारे दस्सेआ दसाया। डी होरें करसानें दे मामले गी ध्यानै च सुनेआ ते मैहकमे आस्सेआ हर संभव मदाद दा भरोसा दोआया। इस दरान उधमपुर-रामबन दे असिस्टेंट फलोरीकल्चर अफसर ते डोडा किशतवाड़ दे फुल्लें दी काशत सरबंधी सहायक अधिकारी होरें डोडा जिले च मैहकमे आस्सेआ चलाई जा’रदिं गतिविधिं बारे जानकारी दिती।

<><><><><><>